

Dūlhe kā Dost



dūlhe kā dost
The Friend of the Bridegroom
by Bakhtullah
[Ao, Khud Dekh Lo 7]
(Urdu—Roman script)

© 2023 www.chashmamedia.org
published and printed by
Good Word, New Delhi

The title cover is a collage of Clker-Free-Vector-Images
<https://pixabay.com/images/id-297283/>; J. Kemp/R. Gunter
<https://freebibleimages.org/illustrations/ls-washing-feet/>; K. Tuck
025-kt-cloud-backgrounds.jpg in https:
[//media.freebibleimages.org/stories/FB_KT_Cloud_Backgrounds/](https://media.freebibleimages.org/stories/FB_KT_Cloud_Backgrounds/).

Bible quotations are from UGV.

for enquiries or to request more copies:
askandanswer786@gmail.com

Fahrist

Khudā se hī Sab Kuchh Miltā Hai	2
Merī Khidmat Bas Taiyārī Hai	3
Dūlhe kā Dost	4
Wuh Barhtā Jāe	7
Injil, Yūhannā 3:22-30	8

Ek din Yahyā Nabī ke shāgird be-chainī se apne ustād ke pās āe. Kahne lage, “Ustād, jis ke bāre meiñ āpne gawāhī dī ki wuh Masīh hai, wuh bhī logoñ ko baptismā de rahā hai. Ab sab log usī ke pās jā rahe haiñ.”

- *Jab Yahyā baptismā detā thā to wuh kyā kartā thā?*
Wuh unheñ pānī meiñ ḫubo detā thā.
- *Baptisme kā kyā maqsad thā?*
Baptismā lene wālā is se taslīm kartā thā ki maiñ gunāhgār hūn. Ab se maiñ bure ḫhyālon̄ aur kāmoñ se dūr rahkar āne wāle Masīh ke lie taiyār rahnā chāhtā hūn.
- *Yahyā Nabī ke shāgird kyon itne pareshān haiñ?*
Zyādā log Īsā Masīh ke pās jā rahe haiñ. Yih kaisī bāt hai? Iskā kyā matlab hai? Kyā wuh hamārā muqābalā karnā chāhtā hai? Kyā wuh

hamārī khidmat khatm karnā chāhtā hai? Aur phir hamāre ustād kā kyā banegā?

Khudā se hī Sab Kuchh Miltā Hai

- *Kyā Yahyā Nabī nārāz huā? Kyā wuh māyūs huā?*
Nahīn. Us ne barī halīmī se jawāb diyā: “Har ek ko sirf wuh kuchh miltā hai jo use āsmān se diyā jātā hai.”

Kitnā dilchasp jawāb.

- *Yahyā Nabī kyā kahnā chāhtā hai?*
Sab kuchh Allāh Ta’ālā ke hāth se miltā hai. Wuhī sab kuchh detā hai. Phir mujhe be-chain hone kī kyā zarūrat hai.
- *Kyā Yahyā yih kahte hue khush yā dukhī hai?*
Wuh khush hai.

Ham bhī bahut mauqoں par kahte haiں ki ūpar wāle kī marzī.

- *Aksar auqāt jab ham yih kahte hain to kyā ham khush yā dukhī hote hain?*
Aksar jab ham yih kahte hain to khush nahīn hote. Ham māyūs hote hain ki Khudā ne wuh

hone nahīn diyā jo ham chāhte haiں۔ Kahne kā matlab hai, chalo, maiñ majbūr hūn۔ Ƙhush nahīn hūn magar kyā karūn?

Lekin Yahyā māyūs nahīn hai۔ Wuh kandhe uchkākar nahīn kahtā ki chalo Ƙhudā kī marzī. bilkul nahīn۔ Wuh ƙhush hai.

Merī Ƙhidmat Bas Taiyārī Hai

Khushī kī lahr Yahyā kī har bāt se chhalaktī hai: Maiñne to kahā thā ki maiñ Masīh nahīn hūn. Mujhe to sirf us ke āge āge bhejā gayā hai. Maiñ sirf uskī rāh ko taiyār karne āyā hūn. Jis tarah Yasāyāh Nabī ne peshgoī kī thi,

Registān meñ Rab kī rāh taiyār karo!
Bayābān meñ hamāre Ƙhudā kā rāstā
sīdhā banāo. [...] Tab Allāh kā
jalāl zāhir ho jāegā, aur tamām insān
milkar use dekhenge. (Yasāyāh 43:3)

Merā bas ek hī kām hai: Is rāh ko taiyār karnā. Jab Ƙhudā kā jalāl Masīh meñ zāhir ho gayā hai to mujhe māyūs hone kī kyā zarūrat hai? Jo ƙhidmat

mujhe dī gaī hai wuh mukammal ho gayā hai.
Maiñne rāstā taiyār kar rakhā hai aur bas. Merī
taraf se koī kamī nahīn rahī.

Masīh kā païrokār hameshā aisā hī sochegā. Asl
ustād aur bādshāh wuhī hai. Merā kām bas uskī
rāh kī taiyārī karnī hai. Asl kām wuhī kartā hai.
Wuhī dilon ke qilon ko toñkar apnā rāj qāym kartā
hai. Ham insānoñ kā is meñ koī hāth nahīn hai.

Dūlhe kā Dost

Tab Yahyā Nabī ek chaunkā dene wālī misāl pesh
kartā hai: Dūlhā hī dulhan se shādī kartā hai, aur
dulhan usī kī hai. Dost to dost hī hai chāhe kitnā
achchhā dost kyoñ na ho. Hāñ, dost zarūr dūlhe
kī khushī meñ sharīk hotā hai. Dūlhe kī āwāz sun
sunkar uskī khushī kī intahā nahīn hotī. Maiñ bhī
aisā hī dost hūñ.

► *Dūlhe kī misāl se wuh kyā kahnā chāhtā hai?*

Wuh yih kahnā chāhtā hai ki Masīh dūlhā hai
jabki maiñ dūlhe kā dost hūñ.

► *Dost se kyā murād hai?*

Us zamāne mein shādī kā pūrā intazām dūlhe ke qarībī dostoñ ke hāth mein thā. Aksar do aise dost the. Un kī zimmedārī yih bhī thi ki dūlhe aur dulhan ko salāmatī se dūlhe ke ghar pahuinchāen. Un kī bahut ahmiyat thi. To bhī wuh shādī kā markaz aur maqsad nahīn the balki dūlhā aur dulhan. Shādī ɭhatm huī to dūlhe ke yih dost ɭhāmoshī se chale jāte the.

► *Yahyā ke nazdīk dūlhā kaun hai?*

Dūlhā ɭhudāwand Masīh hai.

► *Is se wuh kyā kahnā chāhtā hai?*

Markazī bāt dūlhā hai. Maiñ sirf uskā dost hūn jo shādī kī taiyāriyon mein lagā rahtā hūn. Mujhe to dulhan se shādī nahīn karnī hai. Merā bas yih farz hai ki shādī ke intazām par dhyān dūn. Dūlhe kī āwāz sunkar hī merī ɭhushī kī intahā nahīn hotī. Aur shādī kī takmīl par merā kām bhī ɭhatm ho jāegā.

► *To phir dulhan kaun hai?*

Is ke lie hamein thoři gahrāī mein jāne kī zarūrat hai.

Nabiyoñ ne sadayoñ pahle farmāyā thā ki ek masīhānā waqt āegā jab Ƙhudā apnī qaum ko yoñ qabūl karegā jis tarah dūlhā apnī dulhan ko. Yasāyāh us waqt ke bāre mein farmātā hai,

Jis tarah dūlhā dulhan ke bāis ƙhushī manātā hai usī tarah terā Ƙhudā tere sabab se ƙhushī manāegā. (Yasāyāh 62:5)

Yahyā Nabī yih kah rahā hai ki ab yih waqt ā gayā hai. Al-Masīh ā gayā hai. Wuhī dūlhā hai. Aur uskī dulhan uskī qaum hai, wuh jo us par īmān rakhte haiñ. Masīh apnī qaum ko bulāne āyā hai, aur yih baṛī ƙhushī kī bāt hai. Ab tak maiñ dūlhe kī taiyāriyoñ mein lagā hūn kyoñki maiñ uskā dost hūn. Lekin intazām karwāne kā merā kām ƙhatm hone wālā hai aur maiñ baṛā ƙhush hūn. Maiñ kis tarah ġham khā saktā hūn?

Wuh Barhtā Jāe

Tab Yahyā Nabī ek gahrī rūhānī haqīqat bayān kartā hai: Lāzim hai ki wuh barhtā jāe jabki maiñ ghaṭtā jāūn.

- *Is se wuh kyā kahnā chāhtā hai?*

Ahm bāt Masīh hai. Merī khidmat uskī nisbat sifar hai. Jab wuh ā maujūd huā hai to merā kām khatm hone wālā hai. Uskī tārif ho. Bas yih bāt ahm hai ki use jalāl mile, wuhī barhtā jāe. Dūlhe ko dekh dekhkar merī khushī pūrī ho gaī hai.

Ek bār Masīh ne farmāyā, “Jo awwal honā chāhtā hai wuh sab se ākhir meñ āe aur sab kā khādim ho” (Marqus 9:35). Yahyā meñ yahī khādimānā rūh thī. Wuh sab kī khidmat karne ko taiyār thā. Bas, dūlhe ko khush rakhnā hai.

Kuchh dinoñ bād Yahyā Nabī shahīd huā.

- *Kyā uskī khidmat be-fāydā thī?*

Bilkul nahīn. Jo kām use diyā gayā thā wuh mukammal huā thā. Masīh kī rāh taiyār huī thī. Dūlhā ā gayā thā.

Injīl, Yūhannā 3:22-30

Is ke bād Īsā apne shāgirdoṇ ke sāth Yahūdiyā ke ilāqe meṇ gayā. Wahān wuh kuchh der ke lie un ke sāth ṭahhrā aur logoṇ ko baptismā dene lagā. Us waqt Yahyā bhī Shālem ke qarīb wāqe maqām Ainon meṇ baptismā de rahā thā, kyoṇki wahān pānī bahut thā. Us jagah par log baptismā lene ke lie āte rahe. (Yahyā ko ab tak jail meṇ nahīn dālā gayā thā.)

Ek din Yahyā ke shāgirdoṇ kā kisi Yahūdī ke sāth mubāhasā chhiṛ gayā. Zer-e-ghaur mazmūn dīnī ġhusl thā. Wuh Yahyā ke pās āe aur kahne lage, “Ustād, jis ādmī se āpkī Dariyā-e-Yardan ke pār mulāqāt huī aur jis ke bāre meṇ āpne gawāhī dī ki wuh Masīh hai, wuh

bhī logoṇ ko baptismā de rahā hai. Ab sab log usī ke pās jā rahe haiṇ.”

Yahyā ne jawāb diyā, “Har ek ko sirf wuh kuchh miltā hai jo use āsmān se diyā jātā hai. Tum կhud is ke gawāh ho ki maiñne kahā, ‘Maiñ Masīh nahīn hūn balki mujhe us ke āge āge bhejā gayā hai.’ Dūlhā hī dulhan se shādī kartā hai, aur dulhan usī kī hai. Uskā dost sirf sāth khaṛā hotā hai. Aur dūlhe kī āwāz sun sunkar dost kī կhushī kī intahā nahīn hotī. Maiñ bhī aisā hī dost hūn jis kī կhushī pūrī ho gaī hai. Lāzim hai ki wuh baṛhtā jāe jabki maiñ ghaṭtā jāūn.